

IDENTITÂTS

Il procès di globalizazion ch'al sta cjapant simpri plui pît e fuarce in ogni setôr de ativitât umane, cun ducj i beneficis (pôcs) e i svantaçs (tancj, sore dut pai piçui condanâts a subîlu cence podê condizionâlu), al oblee i sengui e lis comunitâts, par une reson dialetiche comprensive e benefiche, a domandâsi ogni dì di plui su la lôr peculiaritât, specificitât, identitât. Par reazion e difese, ma ancje par podê frontâ la cuistion. Dut chest al à mil esemplificazions e complicazions e congruencis che a son sot i vôi di ducj. Il slac dal mûr di Berlin e, plui in grant, dal mûr di cente che al divideve il bloc occidentâl di chel orientâl, al à inviât une schirie di moviments culturâi e politics là che lis gnovis realtâts o sogjets internazionâi, nassûts dal frazionament dal imperi, a cirin in ogni sisteme di identificâsi e di diferenziâsi. Cualchi volte in maniere pacjifiche; masse voltis in maniere conflituâl cun consequencis tragjichis che di bot a fasin vê nostalgjie dai blocs ideologjics di prime. La gjeografie dai stâts nassûts de vecje Russie, de conflagrazion dai Balcans, dai mudaments tal Orient di mieç nus mostre trop ch'al è dificil cumbinâ la proprie identitât cu la colaborazion e la solidarietât continentâl e internazionâl.

Stesse paste cu lis nazionalitâts nassudis a la fin des ditaturis, nemiis mortâls di ogni diviersitât.

La cuistion no podeve no vê riflès ancje chi di nô, ancje se in forme plui smavide, stant la mancjance di une opression cruenta come in altris câs e di une cussience vive come in altris popui e nazionalitâts. Forsit plui pe seconde reson che pe prime. No vint mai vude une cussience vive, serie, concrete e no retoriche, de proprie specificitât, il furlan no dome nol à fatis grandis lotis di liberazion, ma no si è nancje rindût cont di jessi peât come un cjan cu la cjadene di Rome e di Triest. D'altre bande, e al è comprensibil, i parons dal vapôr a fasin di dut par magnificâ lis lôr benemerencis e par minimizâ e sbeleâ i valôrs e i beneficis di une sane autonomie.

Però la gole di savê cui che si è no si è mai distudade dal dut e o crôt che e cressarâ, cul cressi de culture, de cussience e de necessitât. Cui isal il furlan? Cui isal il popul furlan? Isal diferent di chei altris e in ce? O no àial mai vût nuie di specific, come ch'a sostegnin i avversaris de identitât furlane, o no àial plui nuie, come ch'a va berghlelant i palandis de postmodernitât?

Fevelâ di identitât tun popul come il nestri, cu la sô posizion gjeografiche metude tune crosere di civiltâts e esponude a dutis lis invasions e incrosadicis e contaminazions, al è grivi, oltri che ridicul. Parcè che ogni vuere, ogni invasion, ogni ripopolament al lasse lis sôs olmis. Chês olmis che par vieri a vignivin clamâts "bastarts" e che invezit, tal ecuilibri gjenetic di un popul, a son il fatôr determinant pe sô salvece. Parcè che a puartin sanc gnûf. La riprove di chestis

incrostazions le vin te nestre filusumie, ma le vin ancjemò plui te nestre lenghe, fate di plui apuarts, ancje se su fonde latine. Le vin tai nestris cjants, ch'a àn dal todesc e dal scâf ma no son ni todescs ni sclâfs. Il merit dal furlan al è stât chel di cjapâ sù, par amôr o par fuarce, di un e di chel altri e di elaborâ un prodot gnûf, gjenuin, tipic. Come un mulin ch'al masane blavis differentis o un turcli che al sa tirâ fûr un bon vin, origjinâl, di plui cualitâts di uve. Plui che di identitât origjinarie, virgjine (che no esist par nissun), pal Friûl si à di fevelâ di une identitât cuistade, elaborade. In plui, il furlan al à zirât il mont intîr a vuadagnâsi la bocjade e, tornant dongje, al à puartât chenti gnovis sensibilitâts, come l'âf cuant che e torne dongje dal so gîr di rose in rose. Parcè che l'emigrazion e je un puartâ vie ma ancje un puartâ dentri. E un popul di emigrants nol pò no jessi un popul ch'al modifiche, ch'al staronge, ch'al refinìs, ch'al colorìs di un continui la proprie identitât. Po o vin di meti in cont i tancj talians plombâts o rivâts o mandâts chenti par resons militârs o burocratichis. Ancje lôr a puartin alc in chest vecjo cuarp. A puartin e a cjapin. E ancje nô o cjapìn di lôr, come che alc o pierdìn. Mi fasin ridi o vâi chei puriscj, par furtune simpri plui scjars di ideis e di seguit, che si ustinin a sierâ i vôi su la realtât, a dineâ l'apuart just e in cualchi maniere providenziâl di int gnove. No disarai mai che l'Italie par nô e je stade une furtune ma nancje no dinearai che il Friûl al è gambiât e al à di fâ i conts cu l'Italie. Baste che ju fasi in maniere inteligjente. E la maniere inteligjente e je chê di cognossisi, di cjalâsi e di confrontâsi. A di chest Friûl cuntune identitât fate di identitâts, si è lade zontant di un trat di timp in ca, e si zontarà simpri di plui, une gnove component: l'inmigrazion. A stan rivant chenti marochins, algjerins, ghanês, albanês, polacs, ucrains, bielorùs e vie. Int puare che e ven a cirî une bocjade tun Friûl relativamentri siôr e a ufrînus un servizi, une caritât tantis voltis providenziâl. Pensìn dome a lis tantis "badantis" che a girin no dome pe citât ma ancje o sore dut pai paîs, là che si sint di plui la scjarsetât di int. Ducj chescj inmigrâts, che a ripetin a distance di un secul ce che nô o fasevin su lis stradis e sui cantîrs dal mont, a àn une lôr sensibilitât, culture, istruzion, religjositât, identitât. Che e ven a incuintrâsi o a scuintrâsi cu la nestre. Une cuistion no scontade ma nancje tragjiche. Al dipent de buine volontât, de tolerance, dal spirt di adatament, de inteligjence di une bande e di chê altre. E podarès jessi l'ultime pagine di storie dal Friûl. E po jessi la prime pagine di un dai tancj libris che il popul furlan al à scrit te sô lungje storie. Un popul come il nestri, che di simpri si è cjatât a confrontâsi cun identitâts differentis, al varès di vê une marce in plui par frontâ in maniere positive ancje cheste gnove scomesse e par creâ l'identitât dal furlan dal tierç milenari.